

## Peqataasunut paasissutissiissut

**”Spiralilersuisimaneq” aamma 1960-imiit 1991-i ilanngullugu Kalaallit Nunaanni, kiisalu Danmarkimi efterskolini, kalaallinik ilinniartulinni, naartunaveersaatinut tunngatillugu suleriaatsit atorneqarsimasut pillugit suliamut attuumassuteqanngitsunit qulaajaaneq**

Qulaajaaneq una makku qulaajarneqarnissaannik siunertaqarpoq:

- Naartunaveersaatinut tunngatillugu suleriaatsip Kalaallit Nunaanni 1960-ikkunni aallartinneqartup oqaluttuassartaa, tassunga ilanngullugu ”Spiralilersuisimaneq”.
- Spiralit atorneqalernissaannik aamma naartunaveersaatinut tunngatillugu suleriaatsit allat eqqunneqarnerannik kingunilimmik aalajangiinerup ingerlasimanera, tassunga ilanngullugit suliap aallartinneqarsimaneranut, ingerlateqqinneqarneranut aamma naleqqussarneqarneranut suut tunngaviusimaneq. Qulaajaaneq pisortaqaarfinit, suliffeqaarfinit aamma pisortani sulisunit attuumassutilinnit isumaliutinik, aalajangiinernik aamma iliutsinik ilaqassaaq.
- Suliap Kalaallit Nunaanni, aamma kalaallinut nivarsiaqqanut Danmarkimi efterskolertunut qanorpiaq ingerlanneqarsimanera. Piffissap ingerlanerani, aamma Kalaallit Nunaanni nunap immikkoortuini peqqinnissaqaarfinni kiisalu ukioqatigiiaat assigiinngitsut akornanni suliap qanoq atuutilersinneqarsimanera qulaajarniarneqassaaq.
- Aammattaaq ilisimannittut oqaluttuaat tunngavigalugit suliap qanoq misigineqarsimanera qulaajarniarneqassaaq.
- Piffissami tassani spiralilersuineranut, aamma Kalaallit Nunaanni, kiisalu Danmarkimi efterskolini atuartunut Kalaallit Nunaanneersunut naartunaveersaatinut tunngatillugu suleriaatsinut tunngatillugu inatsisitigut, allaffissornikkut aamma peqqinnissakkut sullissinermi tunngaviit.

*Innuttaasoq:* Taamaattumik piffissami 1960-imiit 1991-i ilanngullugu spiralit aamma/imaluunniit naartunaveersaatinut tunngatillugu periutsinik allanik misigisatit pillugit oqaluttuarnissannut peqatiseaatsigit.

*Suliasaqaarfimmi sulialik:* Taamaattumik piffissami 1960-imiit 1991-i ilanngullugu spiralinik aamma/imaluunniit naartunaveersaatinut tunngatillugu periutsinik allanik suliaqarsimanerit pillugu oqaluttuarnissannut peqatiseaatsigit.

Oqaluttuaq oqarasuaatikkut, Sullissivik.gl-ikkut imaluunniit qulaajaanermi ilisimatusartoqatigiinni suleqataasut ilaannut oqaluttuarineqarsinnaavoq.

Qulaajaaneq nalunaarusiornermik, ilisimatuussutsikkut allaaserinninnernik, saqqummiinernik aamma ingerlatitseqqiinernik inerneqassaaq. Kissaatiginngikkukku illit atit sumiluunniit takuneqarsinnaassanngilaq, kisianni oqaluttuatit suliasaqaarfimmi sulialimmit imaluunniit innuttaasumit oqaaseqaatigineqartutut allasimasinnaapput. Peqataaneq kajumissuseq tunngavigalugu pissaaq, aamma nassuiaateqaqqaarnak qulaajaanermiit qaqugukkulluunniit tunuarsinnaavutit. Qulaajaaneq pillugu annertunerusumik

paasisaqarusukkuit, imaluunniit qulaajaanermi kingusinnerusukkut tunuarusukkuit qulaajaasut oqarasuaataannut saaffiginnissinnaavutit, imaluunniit e-mailitsinnut isumannaatsumut allallutit.

Kissaatigigukku oqaluttuat qulaajaanermi oqaluttuanut aamma allakkianut ilanngullugu ilisimatusartut toqqortaasiviannut ilanngunneqarsinnaavoq. Toqqortaatigineqartut uunga tunniunneqassapput Nunatta Katersugaasivia Allagaateqarfialu. Allagaatit toqqorneqartut ukiuni 80-ini matoqqassapput. Tamanna sioqqullugu ilisimatusarnermut atatillugu takunninnissamik piumasaqaatitalimmik taamaallaat akuersissuteqartoqarsinnaassaaq.

### **Qulaajaanermut tunuliaqutaq**

”Spiralilersuisimaneq” aamma kalaallinut niuarsiaqqanut aamma arnanut 1960-ikkunniit 1991-i tikillugu naartunaveersaatinut tunngatillugu suleriaatsit atorneqarsimasut pillugit suliamut attuumassuteqanngitsunit qulaajaanermik aallartitsisoqassasoq danskit naalackersuisui aamma Naalackersuisut 2022-mi isumaqatigiipput. ”Spiralilersuisimanermi” Kalaallit Nunaanni, kiisalu Danmarkimi efterskolini atuartunut Kalaallit Nunaanneersunut spiralilersuineq 1960-ikkut qiteqqunneranni aallartinneqarsimasoq pineqarpoq.

Suliniut Syddansk Universitetimi Innuttaasut Peqqissusiannik Ilisimatusarfik suleqatigalugu Ilisimatusarfimmi Issittumi Atugarissaarneq pillugu Ilisimatusarfimmit aqunneqarpoq. Tamatuma saniatigut KØbenhavns Universitetimi aamma Rigsarkivimi ilisimatusarnermik suliallit peqataassapput.

Suliamut attuumassuteqanngitsunit qulaajaaneq suliffeqarfiit imaluunniit suliassaqarfimmi suliallit nalinginnaasumik ilisimasaannik, pisimasunik ilisimannittut oqaluttuaannik kiisalu suliamut ilaasimallutilluunniit attuumassuteqarsimasunik, suli inuusunik, apersuinernik tunngaveqassaaq. Qulaajaanermut atatillugu arnat attuumassuteqartut tamarmik ataasiakkaarlutik oqaluttuarnissaminnik periarfissinneqassapput, taamaaliornikkut oqaluttuaat tassunga ilaatinneqarsinnaaniassammata.

Inussiarnersumik inuulluaqqusilluta

Tenna Jensen  
Centerimi aqutsisoq, Issittumi Atugarissaarneq pillugu  
Ilisimatusarfik  
Ilisimatusarfik, postboks 1062  
3905 Nuussuaq

Ingelise Olesen  
Ilisimatusarnermi ataqatigiissaarisooq  
Innuttaasut Peqqissusiannik Ilisimatusarfik  
Ilisimatusarfik, postboks 1062  
3905 Nuussuaq

Saaffiginnissutit kalaallisut imaluunniit danskisut oqarasuaatitsinnut saaffiginnissutigineqarsinnaapput  
+299 80 11 30  
+45 65 50 76 74

